
■ SVIZRA

Far ord dus Giuras in chantun?

(anr) Dapi 1979 datti il chantun Giura. El cumpiglia be ils trais districts francofons en il nord da l'anterieur Giura bernais. Ils trais districts en il sid èn restads tar il chantun Berna e furman il Giura bernais.

Adina puspè ha i dà emprovas dad unir ils dus Giuras ad in chantun, pia d'extender territorialmain lur intschess entaifer in chantun. La primavaira èn ins ì en questa chausa in pass pli lunsch. Ils dus chantuns da Berna e dal Giura – sco era la confederaziun – han decidì da realisar tant en il Giura sco en il Giura bernais ina votaziun davart introducir ina procedura cun la finamira da fundar in chantun Giura schlargià. Probabel vegnan ils votants dal chantun Giura sco era dal Giura bernais a pudair decider a l'urna co ils cunfins territorials dal Giura e Berna duaian ir. Premissa per l'unificaziun è dentant ch'omaduas parts francofonas en il sid ed en il nord èn persuenter.

Ussa instradà la procedura da consultaziun

A la fin da zercladur ha il cussegl dil Giura bernais sancziunà quel proceder. La regenza bernaisa ha sin quai suttamess ina

midada costituziunala dal statut spezial per il Giura bernais a la procedura da consultaziun. Il medem ha uss era la regenza dal chantun Giura instradà cun publictar in sboz per il nov artitgel costituziunal sco basa per il plebiscit. La procedura da consultaziun dura fin ils 2 d'october 2012. Alur vegnan quellas midadas costituziunalas mintgamai tractadas dals dus parlaments chantunals e suttamessas a la votaziun dal pievel vers la fin da 2013.

La regenza dal Giura è da la ferma persuasiun ch'i saja d'avantatg per l'entira regiun dal Giura sche quel furmia geograficamain e politicamain in'unitad. La regenza bernaisa è dentant in pau d'autra opiniun. Sch'il chantun Giura ed il Giura bernais din gea a la fusiun vegness elavurà ina cunvegna interchantunala e la suttamess al pievel. Sch'il Giura bernais schess na, fiss la regenza dal chantun Giura pronta da recepir vischnancas francofonas bernaisas – sco quai ch'igl è previs. Quai pudess effectuar ch'i dess exed enclavas. Tenor costituziun federala è in tal proceder pussaivel. En questa chausa è dentant anc bler avert pil mument.